

四庫全書

集部

欽定四庫全書

集部

鄱陽五家集卷七六

詳校官監察御史臣孫家賢

主事銜臣徐以坤覆勘

總校官知縣臣繆

琪

校對官編修臣于

鼎

謄錄監生臣馮廷錫

欽定四庫全書

鄱陽五家集卷六

鄱陽史簡編

元徐瑞松巢漫稿一

公諱瑞字山玉松巢其號也十二世祖諱人元于
唐貞元十八年官河南都運使會昌五年兼九州
都漕運使秩因平黃巢亂特拜符命開藩于饒子
孫遂居饒之慈孝坊八世祖諱立道于宋神宗熙

寧二年率家遷鵲湖世為鵲湖望族大父雲巖公
與叔祖東綠皆善詩叔潔山居士偕公弟可玉宗
玉公從弟楚玉蘭玉皆有文才次第任散官公每
有詩句寄懷及諸弟宦歸各營別墅極泉池之勝
公咏棣其中時與芳洲黎廷瑞月灣吳存山村仇
遠景文湯琛及板橋周南翁竹南許季蕃友善而
月灣芳洲二公里間密邇書筒郵致輒申山中之
約或至歲暮猶策蹇相過從焉公生于宋寶祐甲

寅十二月咸淳間曾如杭應舉不第遂以科舉之
習功名之念奪人清思不復認以為真曾作自省
詩今以家傳所載考之蓋傷宋之亡于帝昺也迨
元延祐丁巳以公經明行修推為本邑書院山長
未幾歸隱于家巢居松下花晨月夕隨所賦逐年
筆記之時來郡城則與三五詩友觥籌交錯于東
湖芝山之間更相唱和亦無虛日所著則松巢漫
稿卒年七十一吳月灣致語曰善人已矣空留千

百年番水之名後世知之當在數十卷松巢之稿
其見重于當時如此後許竹南有懷詩云江北江
南老弟昆三生文會幾評論蚤知傾蓋頭俱白悔
不連床話共溫洲沒艸枯芳士歇巢傾鶴去故枝
存至今惟有灣頭月照我溪南水竹村竹南之意
使俱曰公與黎吳皆鼎峙一時也公姪孜字仲予
一字子文號仰山元大德十年丙午以明經學術
冠于鄉閭值國季設科取士之制荒僅受浮梁教

授善詩律末年轉徙流離備嘗艱苦洪武二年己酉卒著有集聞前叅議義城劉公莘為之序月灣後人吳南壽讀其詩慨然感賦曰仰山倏爾游仙去遺稿親題墨色濃遼海無蹤回老鶴雪泥留跡憶飛鴻半生遊宦心多苦十載流離意愈工為囑錦囊好封襲明時太史會觀風予止見其避亂諸什而瞻烏爰止之情與固守清貧之槩已大可見矣意其紹聞于家學者有自來乎是因得連類而

及之

五言絕句

義合寺二首

峭壁空翠濕
幽林煙霏清
峯巔忽長嘯
疑是孫登聲
枯根絆老石
槁葉填古逕
四山悄無人
鏗然一聲磬

尋幽

尋幽烏石谷
曳杖白雲岡
野燒半空赤
西風萬葉黃

己丑正月二日入山中題岩石二首

一掬岩下水不滿數寸深當其伏坎時已有東注心
我訪桃源人桃源在何處世上無桃源何必移家去

余自入山距出山五十五日竹屋青燈山陰杖屨
忘其癡不了事矣隨所賦錄之得二十首庚寅入
山

石浪嚙我足山雨濕我衣冥行果為誰笑撫桃榔枝
解包

投裝即虛館簷溜猶浪浪主人眼為青熾薪燎衣裳

看雲

濛濛穿石罅片片宿簷端如示變滅相時出復時還

對雪

晃晃紙窓明簌簌時聞落出戶欲尋詩瘦驢雙耳卓

聽雨

疎聲連永夜寒意薄嗌身惆悵三生夢彭城古木春

聽泉

出山靜而清遇石何不平誰能携素琴為我寫此聲

聽簫

嗚嗚傳素恨渺渺起新愁
臺空鳳已去楚山千頃秋

聽笛

有客携笛來一聲山石裂
老子據胡床東峯方吐月

論詩

大雅久寂寥落落為誰語
我欲友古人叅到無言處

煮茶

枯樵生活火清瀑薦靈芽
且賞此味永從渠客未嘉

蘭

綠葉映芳蕤貞姿在空谷紛紛世人同寂寂君子獨

老梅

枯根寄斷崖槎牙老風雪疎花如高人歛衽不敢折

苦菜

采苦南山下載咏采苦詩舍旃復舍旃此味人得知

芹

離離生澗底薇蕨敢雁行人皆美其羹我獨采其芳

劉郎菜

天台採藥客此地菜留名流水年年恨春風歲歲生

黃精

東風抽靈芽厚土長黃玉我欲勤服食從此長辟穀

鷹爪菜

何人品小草乃以鷹爪名吾舌安用甘且得吾眼明

山中

人能
明眼

蒲花

綠穉糝輕黃隨風墮霏屑富貴未足道看取十二節

石窪

飛泉所舂撞懸崖偶成窾信似太山溜吾欲銘其坎

出山

坐覺日月長還疑宇宙隘長嘯出山來如在太虛外

用仲退韻奉寄三首

懷人耿青燈兀兀香事已夢繞明月灣水清見石底
與君外形骸更自離言說此聚雖難常此意終不別

約畧古堰西坡陀山外路相從十二年迎送幾來去

大德二年戊戌正月梅始花

老樹冰霜晚孤花天地心
翛然懷遠韻相對意彌深

己亥重九夜歸篝燈獨酌因思乙未歲是日陪余
敬可携趙定庵馬寧卿王叔文雲隱二三道伴登
芝山駐接仙亭蔬盤果食清談竟日今諸道萍散
而敬可九原不可作對酒淒然殆無以為懷也

重陽當痛飲對酒更生悲惆悵芝山夢死生俱別離

書芳洲題長江萬里圖詩後

萬里朝宗勢其源可濫觴從來不在險畫裏論興亡

庚子九月十四日陪芳洲觀山中泉石次韻

問酒竹籬深尋詩土花碧石上更盤桓長嘯情何極

書壁

辛丑

佳木交穉綠小閣掩春深唯有山西叟相看識此心

夜坐與劉信翁清談

清坐不知疲相對忘賓主他年記此夜青燈聽疎雨

十一月十五山行見梅一枝

丁未

老樹千年意枯槎一點春相逢驚別久竚立重凝神

周德言游小廬山觀余壁間詩次韻示教走筆奉

謝

壬子皇慶元年

美人塵外姿胸次澹孤清空堂語三日隱隱金石聲
蘭茗尋舊題媿我昔好逕妙語為湔袞清越泗濱磬

舟行即景

丁巳

江流千丈碧崖樹一枝紅臨眺延綠久扁舟我欲東

宿常山

小樓臨水際一塔出林端為報山僧喜無勞問數灘

有僧

同舟每舟上一灘必計之
自桐江至常山歷灘百餘

燈影照白髮清醕浣旅顏半生堪一笑四度宿常山

秋懷二首

已未

細雨沾庭濕驚風入袖寒黃花有佳色獨自倚闌看
門巷鳴乾葉階除吟候蟲幽懷不可奈絲雨更濛濛

夜坐

文室四壁靜孤燈永夜明蒲團清坐穩簷鐵兩三聲

六言絕句

夏日六首

巳亥

屋上小山叢桂門前綠水芙蓉問事唯唯否否逢人睚

睚盱盱

客散幽庭鳥集日長高樹蟬嘶有士懷戴安道無人鑄
鍾子期

世眼看朱成碧人情覆雨翻雲寧甘頭責子羽莫教腹

負將軍

偶自棲遲偃仰誰無歷落嶽崎兩別足見美玉九折臂
為良醫

我生尚友千載不願爭名一時閉門寫范滂傳飽飯和
淵明詩

宇宙千年遺事江山幾段閒情一笑無人領畧杖藜竹
外徐行

六言四首

庚子

脚下行萬里路胸中貯千卷書到底只供一笑屋烏何似除胥

畜耳何如畜眼觀人孰與觀願遠道紛紛飛鞚深山有客爭棋

悟得字中有筆却參畫外無詩今人見謂癡絕異世神交特奇

隱几反觀唯我出門與語者誰飲酒止酒俱達借書還書一癡

故夏與南翁往來里社共聽松風盤旋久之欲作
數語不果近日偶至其下悵然興懷追賦六言一

首

辛丑

夜語連床未了村醪時復一鍾不怕石頭路滑要聽古
社松風

送醫士方存方歸弋陽

癸丑

俗子紛紛東閣此客疊疊逼人未論探丸起死壺中刀
七通神

桔梗時而為帝昌陽或笑引年無用乃知有用妙處當
是不傳

但識身中大藥不須肘後竒方我欲與君談此暑途行
計何忙

七言絕句

偶題

曾駐金華傲紫烟偶來此地了塵緣春風白石岡頭路
虛老松花過一年

舟行書感

壬午

斷崖斗絕小舟行
煙樹崔嵬草一汀
宛是釣臺臺下路

楊梅蘆橘正青青

余甲戌三月登釣臺楊
梅蘆橘青青兩山間

東溪舟中呈石齋

癸未

兩山盤屈水中分
紫翠深深日欲曛
孤枕短篷唵夢曉
一鶯啼破半溪雲

東湖枕上

雲邊假息竹方床
天地詩翁一枕涼
杳杳磬聲清入夢

上方老衲起燒香

丙戌除夜泊舟東湖用白石歸茗溪韻書懷

客夢朦朧酒力銷梨雲漠漠路迢迢醒來便欲尋春去
楊柳江南十五橋

空山歲晚足堪娛殘雪千峯水半湖明發臨風想諸弟
共扶白髮進屠蘇

出山歸隱計無成舟泊菰叢膠斷冰記取東湖風雪夜
青熒一點隔林燈

津亭空樹集饑鴉
望斷孤雲是我家
暮角吹寒風漸落
自呼斗酒對梅花

一卷陰符偶自隨
奴星解事亦忘歸
參橫斗轉唵魂瘦
愁絕寒梢兩綠衣

城郭人家餞歲寒
裁紅剪翠饌春盤
湖濱老圃無時態
繞屋畦蔬向曉看

隔岸重門笑語微
搖搖燭影颭簾衣
翠環玉指筓篔簹
尚識輕舟天際歸

勞生可笑類原蠶世路羊腸更熟諳自古詩人例如此
咸陽客舍老青衫

歸撫蒼松笑一場誓無滋味博西涼春風爛熳春雲熱
釀取松花一甕香

封侯幾見夢魂銷千萬徒勞重壓腰只待區中緣了盡
携家採藥住中條

丁亥正月二日自東湖泛舟歸鵲湖

貫酒張帆古渡頭半篙新水送歸舟梅花惜我漂零久

一片飛香入柁樓

正月晦日泛舟詣東湖興盡而返戲作

古渡開帆破暮烟
平明回棹浪鳴舷
可憐煙雨東湖興
絕似山陰雪夜舡

小齋前老梅至二月半花猶未落餘香最可愛

瘦樹枯枝蘚暈青
嫩寒清曉雨冥冥
道人不管花開落
獨愛殘香繞硯屏

讀蘇黃集

戊子

邊人爭問大蘇集仙官解作太史書當時同朝人欲殺
所能者天信不虛

書懷五首

伊優骯髒子自擇蘧蔭戚施我不能試看洛陽紅紫國
何如空谷一枯藤

朱雲豈是丞相吏子房偶作帝者師去就誰能明此道
西風落木鬢成絲

文章意造乃天趣學竒學澁為誰妍皮毛落盡真實在

千載誰續鷓鴣絃

曹劉沈謝易摸索楊王盧駱哂未休
眼底輪囷能有幾
蛛絲塵網百尺樓

枯桐三尺寄古意懸崖夜半鳴風泉
廣陵散曲世不傳
五柳先生更無絃

秋晚對牽牛花懷友

蘸碧輕綃一捻垂
蛻蜒細蔓滿枯籬
曉來風露深深巷
記得相看覓句時

歲戊子聽雨山中枕上賦小詩云竹屋浪浪急雨
鳴道人睡美夢魂清恍然身在廬山下夜半飛泉
落澗聲庚寅秋晚結茅郭仙峯之下東偏斷壑飛
泉接竹注之窓外以便汲取夜聽泉聲淒然有感
賦詩云窓前斷壑落飛泉絕似高簷澗溜懸忽憶
故山聽雨夢繩床孤坐不成眠今年復歸山獨卧
小齋夜半雨至簷溜浪浪夢中恍然山間茅屋之
下泉聲不絕不知吾身之在此也覺而悲感不已

賦此自解壬辰五月廿八夜也

聽泉聽雨不須悲聲本無情我自癡夢覺不同均是夢
寂然妙在不聞時

偶潔甕鼎煮芽茶可玉弟以雲松吟藁至且啜且
哦就成小絕并以卷錦

活火枯樵煮露芽瓢盃顛倒岸烏紗君詩味永加嚴苦
可恨山中客未嘉

甲午夏日讀爾雅有感

梁間客燕一采芑韞上飢鷹肉不肥愛殺前溪雙屬玉
羽毛如雪背人飛

丙申二月既望仲退再來山中意行談舊送別悵
望寄兩絕句其一云別君烏石岡頭路一樹梨花
照晚煙揔是舊來携手處東風回首十三年其二
云入山不遠六七里老我應行千百回昨日與君
談未了今朝策蹇又重來讀之黯然次韻用謝

東風滿眼皆陳迹老樹荒園更斷煙今昔相看只如此

但擽痛飲過年年

夢中幾度尋安道也似當年泛剡回可是山中綠未斷
又從雲外寄詩來

程明大送枸杞數本侑以古詩兩絕奉謝

丁酉

故人念我忍饑坐送我靈苗意甚勤便作深根千歲計
雲間要聽吠狺狺

坡翁尚感黃柑意杜老深知菜把恩此意世間寥落久
自哦詩句繞荒園

書壁

愛山日凭西樓角聽雨長來破寺中可恨無人同此味

繞簷疎竹鳥呼風

林父軒云聽雨是人生如意事聽雨須山寺破屋中

尋梅十首

戊戌并附錄吳月灣拾遺稿次韻山中尋梅十絕

去年冰雪梅開晚立春半月始見花只今至後未五日

南枝已破兩三了

種梅山中十七載出山十年思此花梅花見人應潦

倒令人憔悴筆生了

冰溪凍合路迢迢
雪片疎疎著地消
幽香襲人無覓處
信步行過獨樹橋

想是幽人唵繞樹
冰枝滴瀝舊痕消
幾回夢赴山中
約古堰西邊雪壓橋

山中峭壁孤絕處
瘦樹獨立殊風標
我行矯首坐嘆息
正似高人不可招

山中之人有巢氏
山中之樹枝猶標
自携一壺醉太
古雪月相從不待招

石梁溪上鴛鴦樹昔年樵斧摧為薪詩翁賦詩慰不遇

險語至今驚鬼神

歲戊寅余與芳洲翁意行見之
翁賦長句見集中今廿一年矣

昔人絕嘆殺風景以鶴為炙松為薪梅花何罪厄斤
斧煩君為語主枝神

牆東一株蒼蘚身故人手斲山中雲封植敢忘角弓賦

每到花開如見君

吾家牆東矮梅
壬午仲退手植

東南西北夢中身幾愧烏山石上雲顧謂梅花不如

汝托根常得伴巢君

首陽食薇千古瘦
商山茹芝絕世清
誰能嚼花卧空谷
一物不向胸中橫

正將丘壑傲富貴
坐使羣芳讓獨清
江路野橋供俗眼
何如幽谷一枝橫

頂里苔梅妙天下
蜀花梅龍天下無
放翁詩酒白石笛
二老風流不可摹

騷人不死元水解
化作冰魂瘦欲無
三疊離騷招不得
水濱疎影君為摹

種性還如賦苦筍趣味一似傳水壺持此問梅翻絕倒
荔支瑤柱有同無

暮年擬種梅千樹花下清歌酒百壺畧計此生非過
分不知造物肯從無

烟蕪牧笛不勝哀夢繞西湖幾百回應是詩人有餘恨
斷橋流水為誰開

扁舟欲向西湖去復作稽山載酒回和靖已仙賀老
死梅花見說不曾開

十畝荒園野水邊
盡栽梅樹不論錢
珍重木瓢任真率
年年携此醉花前

巢中高士灣頭客
日賦梅花無一錢
八百斛椒釵十
二不堪持到此花前

九月廿五夜小雨成雪

巳亥

秋來多病怯新寒
香冷衣篝夢易殘
夜半忽驚風雨惡
開門雪已滿前山

寄芳洲先生

庚子

山中二十三年約今日尋詩始得來舉瓢酌水為君壽
從此登臨歲一回

周郎折簡應難致退叟高騫招不來石上留題有神護
不教雨漬長蒼苔

時人近日多輕士造物從來亦忌名只有青山無世態
與君一見若平生

官街雅似何水部文學老于元道州如此身名應貴重
世間清濁易同流

生來道義勝紛華
晚抱遺經學種瓜
猶有愛山心不厭
時時幽夢到煙霞

雪中夜坐雜詠十首

數間老屋雲松下
半畝方塘水竹村
先生觀化耿獨坐
不覺寒深雪塞門

簷頭風缺響鈴鈴
簷外浪浪槁葉鳴
別有宮商人未識
一爐活火聽瓶笙

讀書聲歇茶初熟
古鼎香銷詩未成
起喚歐蘇索白戰

天高海濶不勝情

古人何者是不朽舉世何人善打乖摠是流連光景處
天分幽事屬吾儕

文章有皮有骨髓欲參此語如參禪我從諸老得印可
妙處可悟不可傳

古人骨爛心猶在欲觀古人觀其心我讀古書忘寢食
去之千載一如今

何人求死不得死有士欲生而舍生誰謂古今人品異

要於出處自權衡

穀粟桑麻里俗淳農談竟夕意彌真半壺濁酒陶陶醉
便是羲皇以上人

絕憐山北松間寺門逕漫漫雪作堆衲僧定起夜將半
自撥寒爐分芋魁

看梅不睡非愁夜對酒高談別是春水北山南清興發
遲明踏雪度煙津

二月望暫寓山中感舊

辛丑

出山兩足沈塵土幾夜夢聽山中泉行到向來結茆處
瘦藤枯樹仍風煙

茆茨高下倚蒼石畧約參差跨碧流白髮前坡兩翁媪
相逢漫說十春秋

野花綠水紅香動石壁晴霞倒影竒好句詩人曾拾得

重來絕笑劍痕癡

仲退丙戌觀山有云微
波蕩晴墩倒影動懸壁

石白凝泉瑩似冰山椒雲氣起如蒸小溪流出桃花片

我欲窮源客不能

病瘧新差仲退折梅一枝冒雪跨驢訪我松下且
賦詩一首次韻以謝臘月廿八日也

破雪折梅相料理要將春信報新年獨跨瘦驢披鶴氅
更於何處覓神仙

臘月廿九日芳洲寄綠萼梅一枝詩二首次韻為
謝

故人雪裏寄梅花妙句清寒逼齒牙睡起病隨殘臘去
坐看神水長金華

鶴背從來不載錢
老梅風雪是忘年
春風若肯留相待

定趁灣頭水上舡

仲退有泛舟
往見之約

挽李思宣

壬寅
三首錄其一

芝山携酒詩猶在
芹泮橫經夢已空
篋底更藏書數紙
不堪和淚對秋風

次韻謝拙逸見寄

癸卯
二首錄一

魚雁迢迢不一書
尋真豈為出無驢
去年偶誤梅花約
心密何須泥迹疎

與弋陽徐覺民主簿

昔年熟看靈山面常怪寶氣充其間此行乃與公相識
不負平生識此山

文章政事本一貫道在從教俗論譁為問匆匆赴期會

何如騎馬看煙霞

覺民見任處州遂昌簿
因訟省委修造上清宮

向來自許千年鶴老去真成六日蟾且喜宗盟今日合
歸程不惜為公淹

送從弟蘭玉視牘柳州

時大德七年
三首錄二三

柳侯種柳柳江邊
歲歲春風歲歲妍
若訪韓碑尋柳廟
為持菊蘂薦寒泉

折花呼酒醉南樓
草草三年一笑留
今日要游難似舊
玉釵占喜白雲秋

再用韻送謝拙逸

久悟看山勝看書
夢中猶愛倒騎驢
武夷夙有煙霞侶
目斷晴雲雁影疎

辟俗尋常晝掩門
弄丸聊復了朝昏
折梅且寄春風信

終待相逢慰渴魂

馬天心遠游而歸椎髻變而巾幘袖衣變而逢掖

名字號俱變書亦學顏作三詩寄之

甲辰原三首
錄其一其三

紙上磊落太師字行間突兀玄晏名斯人變幻不可測
卒然見之令人驚

風流千載賀知章晚歲黃冠歸故鄉三島煙霞鏡湖月

此意與之誰短長

馬所居
號三島

送馬君采赴忠定書院教諭

乙巳原三首
錄其一其三

吾鄉灣頭有明月照映空山草木寒頗怪近來光采變

乃知珠徙上餘干

馬所居
名珠灣

孤城上與白雲齊唐宋諸人舊有題弔古不須深感慨
但教殘剩付歸奚

贈別高則山王叔浩

四首錄
三四

采詩直須別具眼論人尤貴平其心莫重所聞輕所見

四方岩穴有知音

則山常采
詩四方

孤洲蘭芷春風晚老樹絲苓夜雨寒何日抱琴重過我

焚香煮茗聽君彈

題小齋壁

丁未

賣藥城南二十秋，得錢取醉酒家樓。
近來不敢出山去，怕有人呼韓伯休。

題鄧梅邊買驢卷後

庚戌

出市難逢陳處士，叩門誰識傅先生。
此行若遇孫郎宴，借筆不妨題子名。

次韻怡如解嘲

子敦尚受坡翁謔山谷何心戲炳之抵掌相看成一笑
折肱始信是良醫

過歇嶺

丁巳

四山竹樹與雲齊
澗水東流江水西
獨策短筇過歇嶺
亂峯疊疊翠禽啼

晚行三橋

晚涼信步十三灣
疎柳高荷欲半殘
時有小舟橋下過
無言獨倚石闌干

靈芝寺

為愛嘉名似故鄉
芒鞋日日此徜徉
非關貪禮瞿曇相
自是三生有願香

八月十八日觀潮

海門乍見一線白
江下濤頭十丈黃
數點紅旗爭出沒
千艘飛櫓下滄浪

登釣臺

雪手升堂讀古碑
先生應笑鬢成絲
滿庭黃葉無人掃

唯有清風似舊時

欲薦山中十九泉
荒榛塞路上無緣
淒涼不盡懷賢意

黃帽催呼蚤下舡

泉在山頂舊有扁此行不及見

舟行不勝節物之感

客中無酒流羈愁
想見家山菊自秋
記取今年重九日

大郎灘下泛孤舟

次馬初心韻

良朋難合易參差
處獨頻頻入夢思
歲晚得君相料理

老懷磊落更誰知

濁酒陶陶時一鍾柴門牢鍵畏迎逢夜來風雪敲窓紙
喜見前山玉作峯

戊午元日

爆竹聲殘曉色分漫天雪片報新春絕憐今日屠蘇酒
不見丁年共飲人

屋角紅梅雪裏香索人管領意深長老松秀出千林表
甲裂皮皺色轉蒼

次韻月灣東湖十咏其一兩堤柳色

廢壘迢迢埤堥連兩堤橫截鎖蒼煙柳絲繫得春光住
畫舫時時雜釣舡

雙塔鈴音

浮屠雙筆仰書天簷鐸吟風破曙煙似為衆生說般若
興亡莫問劫灰年

孔廟松風

蒼然五鬣東海來直幹參天不可回堂上不聞金石韻

空中時聽殷晴雷

顏亭荷雨

急雨高荷乘走盤
顏公一去歲如千
天公不為游人計
端為忠臣雪怒肝

湖中孤寺

崔嵬銀屋澹相圍
突兀禪房水半扉
便是金山古蘭若
坐看孤鳥斷雲飛

洲上百花

後臺花發映前臺紅紫成林綠作堆三日一花尤盡在
願言均作四時開

薦福茶煙

老衲松根拾槁枝石鐺煮茗日舒遲青青亭上晴雲散
正是禪僧出定時

新橋酒旆

裊裊垂楊映小樓吳姬喚客酒新筍倚簷高揭青帘處
認取牆東最上頭

江城暮角

梅花三疊暮雲橫
戍客懷鄉夢自驚
縱是時平爭戰息
不堪吹出入雲聲

芝嶠晴雲

深谷逶迤縹緲中
白衣遙映曉暎紅
時清不嘆唐虞遠
可有商山四老翁

七月十七夜夢中見亡孫概覺而悽愴不已

時延祐五

年也予年六十五矣

夢汝頽然立我傍
言辭慷慨巧趨蹌
覺來落月明窓戶
撫枕潛然泪滿床

對菊用先大父雲巖先生仰高堂壁間韻

小圃秋花孰是強
唯餘老菊殿年光
寒英不獨華予晚
九死猶能不改香

讀靖節和靖詩偶成寄仲退

逋仙只住西湖上
靖節終身粟里中
千古修名垂宇宙
何曾南北與西東

次韻江道可見寄五絕

錄其三
其五

戎壓塵沙汗血勞君如孤鶴立危梢何時過我長松下
共候風爐湧雪濤

世間萬事匪人為消長神機祇自知飲酒不求千日醉
讀書空悔十年遲

次韻寄題文溪許氏秋圃

庚申

我看黃花意甚長紛紛蕭艾不能荒無論楚晉韓家事
萬古秋風只自芳

飯牛

飯牛夙志老方酬
看似為山水牯牛水草尋常自調伏
鼻端不用拽繩頭

腰痛苦甚戲作二絕句

錄其一

十萬腰纏不足珍
腰圍頓減可憐人
折腰不為五斗米
彭澤元來解忍貧

正月念七月灣來訪折千葉紅梅一枝為贈

喜聞環佩響然臻
笑語芬芳絕世塵
林壑荒涼無所有

殷勤送似一枝春

七月十六夜對月有感

合上俱
壬戌

神遊赤壁水光浮想見元豐壬戌秋甲子四周月長好
更無人續宋風流

鄱陽五家集卷六

欽定四庫全書

鄱陽五家集卷七

鄱陽史簡編

元徐瑞松巢漫稿二

五言今體

次韻吳仲退見貽

戊寅

瘦竹相隨立輕堅九節青川平雲澹澹風定樹亭亭
沒悲流俗驅馳累有形揜闕差有味危坐玩義經

天秋分袂後擾擾似年時竟負梅花約空哦春樹詩斷
崖粘凍雪碎石漾流嘶悵望灣頭路扁舟樂泳思

溪上晚眺

望逐飛雲去天低落景黃江湖流不盡宇宙事何長帆
影行空濶漁歌出莽蒼沙平秋草遠鷗鷺未相忘

秋夜

沉沉秋夜靜輕策步中庭止酒天真澹烹茶世夢醒風
枝繞驚鵲露草度流螢物化猶如此浮生可得停

臨泉寺

扁舟駐寒瀨輕策到臨泉僧說黃巢事碑鏡慶歷年幽
花荒甃晚落木古城煙興廢俱陳迹相看一惘然

重過鐘潭寺月灣有詩次韻

癸未

五年三到此門逕怪頻移絕壁何年樹空廊異代碑微
瀾生古瀨浮翠擁修眉煑茗談時事山僧總未知

無庵道人贈硯報之以詩

別去驚離索重來更劇談送人還有硯住世却無菴白

鶴千年化黃梁萬枕酣區中緣未畢一見一回慚

求余敬可字與小兒習不至

點黠今誰妙波戈古莫稽要令識陣馬不是厭家雞
鄴瓦玄雲濕溪藤暮雨淒媿無鵝可換萬一付歸奚

月礪自杭歸以詩問訊

記別秋風裏聞歸禁火初深慚聊爾耳久闕問何如
梅雪西湖鶴潮風東海魚經行入詩否早晚叩精廬

涉世

涉世頭將白
耽詩貌欲枯
晨齋參玉版
夜渴飲冰壺
咄知今是栖
栖媿故吾
窮通端有命
一笑視平蕪

題舊藁

書向愁邊著
詩添病後吟
不成千古事
空費一生心
華

髮江湖晚
青燈風雪深
鍾期那可鑄
塵網斷紋琴

坡詩
火急

著書千古事
唐詩吟成
五字句用破
一生心

醉中作

歲月驚虛擲
風霜信飽更
蚤知窮有命
惟以飲留名
人

事宜藏拙天工亦惡盈浩歌因起舞月到紙窓明

戊子元日

歲歲春風面年年山澤儒不知老將至但有醉如愚殘
雪明岡阜新晴樂烏烏身安即如願何必問清湖

雨中對醑醅

隱隱滄綠霧盈盈積玉塵濃香欲醉客妙質不爭春已
是園林晚那堪風雨頻先生如有素終日澹相親

讀畫史

子敬因成駁曹興偶畫蠅初非有意作竟以絕倫稱鑄
錯吾何恨求全古所懲中年思爛熟巧力不須矜

題王朝英修竹齋

文章虎豹皮標格雪霜枝孤立天所賦一清人得知勿
論千戶等可忍十年飢會得箇中趣何須汗漫期

對此
莫論

無肉瘦閉門可忍
十年飢枚翁詩也

與陳善從

出門小天下知子欲昌詩廬阜孤雲眼芝山夜雨思勿

輕千里別動是隔年期萬一踰淮去毋忘橘頌詞

陳尊
人家

廬阜其弟

寓鄱陽

庚寅正月十六携家入山大雪彌旬止既月叔祖

東綠翁以那知風雨夜復此對床眠分韻瑞得那

眠字

辟俗過逢少離居感慨多豈伊泉石勝奈此簡書何風
雪日如此乾坤理則那隣翁能貰酒一笑且酣歌

骨肉終青眼一林有素緣偶來成許日此聚豈非天悟

解由災疾遲留費歲年東風方作惡萬事付佳眠

夏五有旨徙豪右郡邑以吾家充數與章正卿同
泊舟琵琶洲下

去國羈懷惡開帆眼界新同為萬里客猶是一鄉人浪
說王孫富誰憐郭解貧江妃應笑我從此素衣塵

故友湯景文別六年乃十月廿一尋我松下臨別

見贈次韻奉答

丁酉 湯名琛
東澗公從弟

占氣頻翹首青牛忽度關相看雙眼碧劇論寸心丹時

俗客遲鈍交情見往還盟言天為聽萬一莫辭難

景文與瑞

有讀書山間尋
真方外之約

次韻景文社屋留題

四海誰知已江濤正渺然山林聊偃息歲月易流連
行李清霜曉荒祠落木天留題不盡意感激尚君賢

馬可卿棄家學道衲衣椎髻飄然有物外之思賦

二詩為贈

戊戌

去去休驚俗循循且任真端能一宿覺不負百年身有

種穀斯熟深根樹自春向來陳處士還帶華陽巾

我祖徐從事君家馬自然何曾絕倫誼皆得列神仙四

百金丹字參同鼎器篇能通言外意即此是單傳

魏伯陽以

參同契授徐從事張平叔以金丹四百字授馬自然

次韻芳洲見寄

地偏寡迎送書至慰蹉跎此世知音少吾生可悔多虛
懷忘寵辱遇物任誰何未了山中約期君難重過

次仲退賦牡丹韻詩中有欲將傾國色故惱在家

禪之句 己亥

雨餘春意足睡起曉光懸
衆卉自開落吾心無醜妍
掃空方是道下語已非禪
隱几脩然久疎林起淡烟

吳義甫號宜山以星纏推賤庚并遺以詩次韻奉謝

為愛山宜隱從教世莫知
虛心觀象緯戲墨出蛟螭
詩

卷今餘事丹爐彼一時
宜山子姚子千載共風期
吳尊人常

營別墅館方外士雅意丹學 陳后山集有送姚先生歸宜山三絕姚益得道之士而宜山乃其隱所也

十月乙酉西山訖事悼亡二首

渺渺笙篔夢茫茫石鏡綠斷絃終莫續浮沫更堪憐濕
土新阡雨啼鴉老樹煙一聲鄰笛起淒咽泪如泉
我已空諸幻君今斷後緣圓明應頓悟成壞不須憐玉
宇行孤月冰溪破冥烟兒曹修非薦再拜酌寒泉

送姚聖可歸盱江

丙午

識面三年久論心此日同相從方款款索去又匆匆宇
宙塵機息江湖老眼空南枝春信早歸路載東風
未了區中事先留方外盟仙才雖有數大器豈無成白

髮高堂夢青山故國情君歸相慰藉未及水初生

次韻東臯雨後行

久雨書闌坐初晴竹伴行遠林更舊綠流水帶新聲隨

境皆天趣無心任世情芒田公獨樂吟嘯了浮生

芒田東臯

寓居

梅山周公挽章

戊申 三
首錄 二 三

才力千鈞弩襟期百尺樓吾生能幾見異世有同流起
起悲前夢堂堂悶一丘哀榮動州里外此復何求

東閣游從久西州慟哭頻
感君敦古誼待我異他人
對酒言猶在看山迹已陳
惟應舊賓客相對一沾巾

寄周南翁用月灣寒食韻

獨夢雲千里清愁雨一林
江山空有約桃李易成陰
自是乖幽賞何由話苦心
興來當逕造剪燭夜堂深

夏日讀陶韋詩偶成

庚戌

詩道貴和平由來寫性情
要知衝口出絕勝撚髭成
理到辭須達神超韻自清
無人融此趣庭戶綠陰生

吳長裕惠詩次韻為贈

丙辰月
灣之長孫

此士睽違久流年倏忽更詞章如水進談笑喜風生無
以小害大當期實勝名傳家有師法晦木定春榮

李田道中

老樹圍修竹清流浸白沙沿山石磊砢隔岸路丫叉漸
漸鄉音別迢迢去意賒淪茶誰氏女鬢髮墮烏鴉

除夜哭仲孫概

階庭皆秀發念汝獨敦龐處事怯藏勇臨機智若戇痛

渠二豎惡何日片心降硯席凝塵滿依然在北窓
我老那堪哭吞聲泪一襟應門差慰眼伏枕獨傷心白
壁歸黃壤孤墳寄古林淒涼重泣痛臨絕有遺音

次劉東仲見寄咏

戊午

手姿明玉樹清論瀉秋泉霧豹文何澤風鸞意自仙超
然由靜悟妙處可言傳倘遂卜鄰願游從不計年

用月灣咏寄題江儀仲心遠堂

辛酉

湛湛秋潭靜沉沉夜璧光斂之不盈握舒則可包荒今

古事無盡乾坤夢正長
爐香清晝永物我兩俱忘

七言今體

歸來 丁亥

歸來便覺此身尊
傲世猶嫌習氣存
已是半生走風雨
但持一笑信乾坤
貪閒且復逃空谷
自銜終羞倚市門
庭院綠陰生
午寂坐聽禽語對清樽

東綠叔祖得園池之勝於萬山深處將拔宅而居

馬以詩奉餞

時至元二十四年丁亥歲

兩僮自足負琴書載具何勞遠借車客至未妨投轄飲
地荒正好帶經鉏欲從隱者歸盤谷尚念先人有敝廬
擇勝懷居竟誰是定知明哲笑迂踈

東綠翁既居山中而瑞方葺敝廬再用前韻

見說移居只載書高人從此可懸車看松北崦風吹面
種豆南山月滿鉏拙計不能爭子所癡心尚自愛吾廬
辟人辟世將焉擇獨立西風鬢影踈

留汪子明

戊子

美人渺渺隔秋水六年不見心茫茫
麥昂黍低各自媚
鶴長鳧短庸何傷
荷鋤未厭素業在
讀書從來真味長
是間偏仄不稱意
待晴携酒登重岡

次韻寄題李氏月心精舍

坎陽為心亦為月
妙質一點何玲瓏
君看靈光湛止水
孰與明鏡行秋空
萬古娟娟不改色
百年忽忽俱成翁
盈虛如彼莫消長
試參此語將無同

次韻陳心田郊居即事二首

想見從來種種迂
讀書採藥灌園蔬
看山不厭風期別
與世相忘機事疎
正自未妨犀首飲
足知不作子公書
詩名莫落江湖去
怕有人來畫子廬

五老亭亭翠塞門
煙霏雲氣濕前軒
浮華安有千年寶
至潔何如一尺渾
曉瀑分寒歸茗椀
春江瀉綠入藤樽
君詩已是肱三折
為我探囊試合昏

用仲退韻別周南翁

壬辰

薄俗難諧祇自知
百年幾見費心思
平生鮑叔深憐我

後代揚雲不並時春雨情懷惟有酒男兒歲月但供詩
汀洲草長東風軟一笑旗亭又語離

癸巳二月寓城與趙希文

趙名補遠
號菊泉

城郭春深午夢醒覺來玄思獨冥冥靜中自笑渠非我
醉裏渾忘影答形有客不傳皇極數何人獨愛太玄經
古今此意誰能會雨暗長堤草樹青

壁侍者來訪作此贈之

丙申

俗論卑卑不足聞相從松下慰離羣喜師一吸西江水

許我平分華嶽雲更向鋒前來妙悟莫于紙上泥陳文

純陽石薛黃龍老肥瘦何曾彼此分

張乖崖未第時致書陳希夷欲分華

山一半

純陽真人參黃龍禪師

石杏林

真人度薛道老和尚

寄芳洲先生

秋入郊原四望空石梁老樹立西風文章子不減班掾
丘壑吾能過庾公池上紛紛成底事尊前兀兀有奇功
山中芋栗今朝熟萬一尋盟搢拙紅

用前韻寄仲退

虛堂宴坐萬緣空
疎竹泠泠度晚風
政自悠悠隨世運
無論憤憤到天公
病來茗枕成竒祟
老去蒲團策雋功
忽憶樂平吳直學
八年不共地爐紅

芳洲寄示和章且及方外之學再疊奉謝

前修零落典刑空
堆筆須君振古風
敢意嚴詩編杜集
但希顏詠黜山公

顏延年評竹林七賢山濤王戎以貴盛黜而不取仍作五君詠

區中

隨順何妨道物外
佯狂更有功
安得相携登岱嶽
天門

夜看海濤紅

芳洲次韻云欲寄音書碧宇空幾回溪上佇秋風離愁自嘆三千丈飛夢長隨十八

公尚喜蘭孫懷舊好頗疑梨棗悶新功寅君近
況知何似想見丹爐夜夜紅以公乃寅生也

三月廿夜同徐月齋讀參同契次所贈詩韻以謝

丁酉

天高地下物林林生化無過陽與陰誰向一中窺竅妙
君子靜處見幾深蟾烏有象明生鏡桐梓何情音在琴
正好小留論此事可堪杜宇促歸吟

對酒

坎止流行信此身只憑詩酒過殘春地偏自覺日成趣

道在何妨歲食貧且養金丹娛晚境難將白髮事時人
但餘未了名山債竹杖芒鞋入夢頻

余自戊子至丁酉十年之間詩不及百首而困窮
流落之狀歷歷可見雖然政使歲得百首亦不過
流連光景而已焉攸用感嘆之餘賦此自警

吾生汨汨何所就祇送流光添鬢絲起尋諸老已半鬼
回首十年無百詩刻意文章終害道無心世路任多岐
便須擘畫三千歲不住青城即武夷

寄宗玉弟

日長獨坐耿相思
每報平安慰我飢
舉動豈知遭齒舌
送迎誰念用符移
轉丸鳴鏞應無滯
絢錦弋旌未是癡
更著加餐題紙背
晚成在子莫憂遲

偶題

陶公恒得法外意
張顛獨悟書中神
口耳不到方是妙
言動可擬皆非真
寒泉泠泠出空谷
幽鳥疊疊鳴陽春
政索解人不可得
舉似俗子翻成嗔

余與仲退讀書山間壬午至戊子無一日相捨己丑
仲退去此余亦連年憂患回首已九寒暑念此樂不
可復得感慨不已作字寄仲退覬其蚤賦歸來也
獨聽松風度九夏兩髻無情生二毛渠儂翰墨流聲遠
老我山林畜眼高往日相從不知樂只今說夢竟徒勞
男兒肯受人拘束相見頻頻賦大刀

自省

戊戌

閉閣焚香一欠伸晴窓如鏡暖如春平生自有會心處

後世豈無知我人漫註蟲魚消白日莫緣蠻觸喪天真
客來指點牆東栢雪壓風欺色轉新

仲退示芳洲閒居律詩三首并示和章次韻寄芳

洲一笑并簡仲退

己亥

契闊難逢笑口開溪雲山雨首頻回未能千橘為身計
尚笑三槐待子栽我道從來高勇退君詩况自耻嗟來
有親可養人生樂拚取餘年學老萊

老子文章興尚狂看花可復夢名場誰憐用意平生苦

欲俟知音來世長
郢俗但能聽下里
騷人更待賦高唐
年來頗欲焚吾硯
蓑笠田間百念忘

翟公莫厭雀羅門
杜老甘居獨樹村
諤諤固應賢唯唯
昭昭元不似昏昏
窮居有分行吾意
君子觀人論所存
未必鍾期曠千載
興來一再撫桐孫

讀仲退和胡秀才詩有感斯文用韻

文章聖處無誰語
獨立蒼茫祇屢臚
從渠高眼空四海
自古名家能幾人
愛烏怒蟹言何淺
畫虎雕龍技漫新

吾道澹成終雋永莫矜盛氣怨私貧

次韻寄題嚴氏尋古齋

庚子

馬圖龜畫未是易龍文烏章豈其書能窮有象有數外
始識無聲無臭初身從浩劫得所賦神遊太虛以為居
吾人尋古儻悟此以後觀今非古與

次韻金壁夫見寄

萬緣勘破等飛煙習氣消除得聖顛撲滿無情又佚老
鴟夷有味可留年美人渺渺空勤夢吾道悠悠莫問天

上界從來足官府山林自好更求仙

二月廿九日收宗玉弟京口書還家有日喜而賦

詩

大德三年

半歲無書界我胸短蓬念汝過殘冬官情但可京口酒
客夢應隨浮玉鐘棄縱向來緣底事妍粧今日為誰容
書來賸喜歸期近伴我清唵倚老松

壬寅和謝拙逸寄芳洲韻

謝名維熊
武夷人

塵埃野馬謾勞形遠想高標愧此生已許過從陪杖屨

敢辭來往涉途程
幔亭山色長如畫
破衲秋風自有情
更待焚香參太極
朱絃端為發奇聲

余與芳洲有秋杪
往訪之約而近書

論太極
故云

正月十五日灣偕胡茂元來訪別後用月灣韻

寄贈茂元

癸卯

敲門驚怪有此客
清似金莖秋露盤
名驥已超千里疾
老松甘卧故山寒
共商今古須臻極
遠溯風騷不作難
從此頻頻相料理
案頭苜蓿對闌干

寄徐逢原求墨

甲辰

北李骨朽呼不起老石珍藏癡可憐
松身鏡面徒外美犀紋玉質知誰傳
古今賞覽那復有舉世繆幻何由湔
一螺點漆倘寄我會見枯筆生春煙

送表弟王復翁赴武陵教諭

漢朝最貴文學掾況遇明時早及瓜
鄉國幾年工取友詩書累世克承家
斜飛聊展天南翼逸興應隨海上槎
聞說秦人遺跡在更尋漁父問桃花

胡和卿用所贈王復翁韻見寄疊韻奉謝

乙

世味居然如嚼蠟
貪閒猶愛故丘瓜
寸心自欲期千載
一理端能貫百家
為山功夫在進篲
窮源消息問乘槎
此去相從須有日
裂牋聊當寄梅花

送從祖還黃州桃花鎮寓居

禮服悠悠歲月深
歸來城郭豈堪尋
葬防不背先師訓
居賴能知前輩心
古驛桃花勞遠夢
征途柳色動新吟
秋風儻有南飛雁
莫惜頻頻一寄音

仲春留周氏館中與仲退怡如劇論旬日而後返
二君寄詩次韻為謝

番君遠韻衆辟易崖仙清致莫誰何二士共談敦古誼
一夫獨醉許高歌人疑桑下留何久我喜鋒前悟已多
會見漁樵成保社典衣先自買青蓑

從弟楚玉來言將有湘陰之役蘭玉見寓衡陽甚
適求詩送行為賦長句

南嶽峻增太古色青湘窈窕千尺深山川絕勝宜嘉客

兄弟相望愜素心
共看驂騑誇汗血
從知朝市遠雲林
高堂白髮能無念
可是朝朝候鵲音

用仲退韻寄芳洲

早年厭俗不免俗
老去求閒未遂閒
學道已輸先得髓
讀書空媿僅窺班
逍遙我欲遊塵外
屈曲渠能自世間
目斷漢廬煙樹老
悠悠白鳥獨飛還

客中清明

丙午大德十年

光陰迅速一百六
老境侵尋五十三
千里懷人黯風雨

五更歸夢到松栲丹爐火足心兵息茗椀香濃舌本甘
次第盡償芒竹債結茅歸老此山南

次韻仲退木犀一首

門前老樹繁秋英濃香醉客我獨醒空山無人境寂寂
蕭齋如水風冥冥清標自是欠花譜遠韻差堪著酒經
君家剛猛兩荒幻且挹危露培修齡

吾族盤石將挾堪輿家出遊索詩送行

天星墜地化為石盤石即是星之精觀天必識經緯象

相地始知流峙情，豹林將軍累世顯。龍岡文章千載名，
古人妙中非浪漫。發抉幽微在此行。

春日感興有懷芳洲

丁未

老去空驚歲月遒，桑榆雖晚尚堪收。鬢霜任自桃花笑，
客意難憑燕語留。勝地有緣頻入夢，清吟無興獨登樓。
故人家住滄洲上，幾夜相思欲泛舟。

劉元輔寄詠史詩六十首賦此為謝

永嘉諸老不可作，史傳紛紜孰與評。一字不輕嚴衮鉞，

千年如見審權衡常憂此道無人識忽得公詩老眼明
雪手焚香三讀罷小樓坐對晚山橫

贈別彭東臯

芝山相識廿年前我齒如水子鬢玄顏貌頓驚俱醜老
光陰自嘆祇流連近來酒渴應剛制此去詩篇莫浪傳

語別有期頻作惡預憐清夢繞新田

新田東
臯寓居

次韻題南翁悠然閣

戊申

去家幾度憶瓜丘付與閒人一壑秋林下定知無俗駕

室中應自有天游幽懷時撫竹根枕清賞堪浮蓮葉舟
夜直玉堂明月冷迴光還是照高樓

題節婦馮氏傳後用南翁韻

馮本東平王氏婦夫
早死兵馮能保遺腹

子守節不嫁及見其子成立以壽終是為金
吾郡推官王耀卿之祖母方虛谷為其作傳

夫征婦孕判居行夫沒兒存婦節清不背所天終此義
信知有欲甚于生芳名真足留千載百偽無如仗一誠
定謚何人敢當筆春秋萬古自昭明

月灣約遊鵝塘不果再約送南翁北上共了廬阜

之債以詩訂盟

鵝塘阻赴登山屐廬阜端隨下水舡況是故人當送遠
不乘清興待何年英雄埋沒龍長卧道學榛蕪鹿自眠
訪古歸來春意動倚峯要了看山綠

送南翁待制北上

生來畏別不堪聞十四年中三送君挂席壓平彭蠡浪
載家喜見太行雲對揚入掌絲綸寵紀頌行看金石文
猶有鵝塘遺意在一麾須早乞江濱

次韻月灣午坐偶成

庚戌至
大三年

年來與世亦嬰兒，衆欲紛紛看朵頤。
簡策祇留遺事在，英雄空有大名垂。
斲輪老去誰堪付，彈缺歸來未覺遲。
少約林泉今白髮，不償素願待何時。

月灣關地山中誅茅歸隱，怡如賦詩次韻贊決。

一去山中廿二年，重來有約竟茫然。
窮居笑我頑同石，文事多君彩印椽。
今日開山作宗祖，向來彈缺等風煙。
餘齡賸喜遊從樂，更結青烏白鶴緣。

作意歸來孰謂非挹芳有地復何疑遲留固是全交道
勇退方知識事宜尚用侍郎書戶契肯求節度買山貲
風流莫遣諸兒覺共被同行又一奇

題周南甫草窓吟卷後

辛亥

水中鹽味誰能識鐸裏宮聲未易聽正惜無人繼風雅
忽傳佳句到林垆雲開瀟岳撐千仞春入雷江漲四溟
遙想清吟得天趣窓前草色自青青

許季高怡如相繼而逝仲退有詩悼之亦復次韻

嗚呼二子遂如此里閨淒涼誰與歸生養死藏情永痛

季高父未葬
怡如父尚存

雷號野哭涕徒揮久悲前輩存無幾今嘆

斯文事轉非獨到青燈哦楚些西風獵獵颭簾衣

送凌霽雲赴餘姚州學正

癸丑皇
慶二年

天門振鐸聲彌遠越上橫經任更專頗怪風雲紆官轍
故因山水著名賢圩田秋足先生飯海月春浮坐客氈
聞有世南遺墨在歸鴻儻一寄林泉

元日題仲退漫游四藁後

丙辰延祐三年

夫君汙漫路萬里翰墨游戲詩百篇高歌不覺屢擊節
畫寫似曾親執鞭竒探馬遷作史意老氣杜陵出峽年
何當囊筆拄杖屨與君題徧名山川

次韻仲退元日

松根坐穩逢元日雲外詩來寄此翁入眼辛盤春意綠
多情蜜炬曉光紅兒孫拜舞歡聲洽節物暄妍往日同
却憶少年觴栢酒觥舡到手吸長虹

上元曾記昔年游歌曲如山浩莫收公子喜陪蒼玉佩

佳人笑指水晶球一天星斗飄仙樂萬頃芙蓉簇彩樓
風雪與誰堪說夢酒闌驚覺在吾州

梅巖 丁巳

不見此山四十載巖石相看亦粲然顧我丹心今不改
信渠鐵面晚猶堅人生出處無非數文運昌明自屬天
尚恨山靈知我淺小樓呼酒對嬋娟

王辛甫示朱敬堂釣臺詩卷次韻

七里灘光照客表雙臺登覽意難休當時茂視麒麟楨

季漢反成黨錮鈞山水何心供弔古奸雄有面肯包羞
摩挲蒼峭追陳迹四十四年重泛舟

江道可用前韻見屬再疊謝之

秋風吹破木綿裘一棹東遊興未休幼學古人徒自好
遺經深義不能鈎槐黃滿路君宜往髮白盈簪我亦羞
共飲番江不相識富陽磯下却聯舟

月灣以路學正攝番江長收租長洲有懷朽鈍賦
詩遠寄次韻為謝

學道如撐上峽舡蹉跎富貴與神仙對床猶記聽風雨
講席何堪數歲年少日朋儕隨化盡晚塗老病有誰憐
故人厚問今何似筋力雖衰尚服田

閏八月望日登青陽峯觀可玉所得天池之勝已未

天風吹我上崔嵬凍面灑塵亦快哉止水泓澄金鏡淨
遠峯羅列畫屏開幽竒定有神仙到險怪從教俗子咍
莫道此中無勝槩會看變化起風雷

石林董先生年八十七厚齋詹先生年八十四會

于文溪月灣賦詩次韻奉寄

石林居士詹山老鶴骨山清出秀眉已卯相逢芹泮日

戊申共酌菊花枝年華迅若東流去道貌歸然太古遺

不恨文溪不同會續貂猶得寄篇詩

歲已卯遇石林翁于泮宮從容久之

時泛舟以禮樂詩書自隨戊申九月與厚齋翁會梅山堂為言今居尖下去吳氏五里許易尖為詹云

李俊民三十年前凡兩寄詩時困于世故俱不克

和常抱此欠近理敗篋忽見兩詩歲月可驚淒然

有感輒賦長句附便以謝不敏

囊錦當時兩度傳，篋藏中襲墨尤鮮。高情應怪詩郵斷，末路那禁俗累纏。過客談君吟轉妙，閉門笑我病堪憐。擘牋漫寄西風去，喚起鄉盟三十年。

門外意行有感書示二孫

壬戌

門前老樹飽風霜，封植良勤不可忘。累世衣冠流澤遠，百年基緒慶源長。穉松怒長堪藏屋，新筍初抽已過牆。珍重先人有遺訓，讀書餘力及耕桑。

夏五寄趙菊東


金少隱詩集卷之二
卷六
溪堂相望一百里音問相疎十五年眼底浮華俱已矣
籬東老菊獨依然登臨不減青山興陶寫猶懷白石編
待得秋風稍涼冷方壺深處扣真玄

寄山村仇公

山村老子知何似想見龐眉鶴骨清千里相望勞遠夢
六年不見耿深情雲歸山翠沾衣濕雨過湖光照眼明
最是湖山圖畫裏輸公吟嘯了平生

李俊民寄詩一首次韻答之

世途險隘任崖顛萬古人心只一天桂辣何須分老嫩
蜜甜自是透中邊多君歌嘯酬風月顧我呻吟了幾年
何日相從討幽事松醪滿意泛觥船



都陽五家集卷七